



Broj: 01-45-00401/23
Donji Vakuf, 02.03.2023. godine

Na osnovu člana 24. stav (1) Zakona o unutrašnjoj trgovini ("Službene novine Federacije BiH", broj: 40/10 i 79/17), člana 11. stav (2) Zakona o ugostiteljskoj djelatnosti ("Službene novine Federacije BiH", broj 32/09), člana 34. Zakona o obrtu i srodnim djelatnostima u Federaciji Bosne i Hercegovine ("Službene novine Federacije BiH", broj 75/21), člana 24. Statuta Općine Donji Vakuf ("Službeni glasnik Općine Donji Vakuf", broj: 1/08, 2/12 i 3/16) i člana 80. Poslovnika o radu Općinskog vijeća Donji Vakuf – Prečišćeni tekst ("Službeni glasnik Općine Donji Vakuf", broj: 5/17, 7/17 i 4/20), Općinsko vijeće Donji Vakuf na 22. redovnoj sjednici održanoj 02.03.2023. godine donosi

O D L U K U
o radnom vremenu u oblasti uslužnih djelatnosti
na području Općine Donji Vakuf

DIO PRVI - OPĆE ODREDBE

Član 1.

Ovom Odlukom utvrđuje se radno vrijeme u toku sedmice, te početak i završetak radnog vremena u toku dana u objektima koji se nalaze na području Općine Donji Vkuuf, u kojima fizička i pravna lica, u skladu sa zakonom, obavljaju uslužnu djelatnost: trgovinu, ugostiteljstvo, turizam, obrt, dnevnu brigu o djeci, djelatnost igara na sreću (u daljem tekstu: uslužne djelatnosti).

Član 2.

(1) Minimalno radno vrijeme je vrijeme u kojem objekti u kojima se obavljaju uslužne djelatnosti moraju biti otvoreni radi zadovoljavanja potreba građana.

(2) Minimalno radno vrijeme traje najmanje 8 (osam) sati dnevno, s tim da ne može biti kraće od 4 (četiri) sata prije podne i 4 (četiri) sata poslije podne, osim ako ovom Odlukom, za pojedine uslužne djelatnosti, nije drugačije određeno. Izuzetno subotom i nedjeljom i u dane državnih i vjerskih praznika, može se utvrditi i kraće radno vrijeme.

(3) Radno vrijeme može biti i duže od minimalnog radnog vremena utvrđenog ovom Odlukom, na način kako ga odrede poslovni subjekti koji obavljaju registrovanu djelatnost u objektima, a u zavisnosti od uslova i potreba.

(4) Radna sedmica objekata poslovnih subjekata iz člana 1. Ove Odluke ne može biti kraća od 6 radnih dana, osim ako ovom Odlukom nije drugačije određeno.

Član 3.

(1) Raspored, početak i završetak radnog vremena se utvrđuje u ovisnosti od toga da li se radi o zimskom periodu (01.10. do 31.03.) ili ljetnom periodu (01.04. do 30.09.). U ovisnosti od vremena može se uvesti dvokratno radno vrijeme.

(2) Radno vrijeme mora biti istaknuto na vidnom mjestu na ulazu u poslovne prostorije – objekte.

(3) Lica koja obavljaju uslužne djelatnosti dužna su pridržavati se istaknutog radnog vremena.

DIO DRUGI – RADNO VRIJEME U OBLASTI USLUŽNIH DJELATNOSTI

Poglavlje I. Radno vrijeme prodavnica na malo

Član 4.

(1) U prodavnicama u kojima se vrši promet na malo prehrambenim proizvodima može se odrediti radno vrijeme svakim radnim danom od 06,00 do 21,00 sat u zimskom periodu, odnosno od 06,00 do 22,00 sata u ljetnom periodu.

(2) Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme mogu raditi dvokratno.

(3) Odredbe iz stava (1) ovog člana ne odnose se na pekare koje u svom sastavu osim proizvodnog imaju i prodajni dio. One mogu odrediti radno vrijeme od 00 do 24 sata.

Član 5.

Prodavnice tipa dragstor moraju biti otvorene neprekidno od 00 do 24 sata.

Član 6.

(1) U prodavnicama u kojima se vrši promet na malo neprehrambenim proizvodima može se obezbijediti radno vrijeme svakim radnim danom od 08,00 do 19,00 sati, a subotom od 09,00 do 14,00 sati.

(2) Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme, može se raditi dvokratno, a u skladu sa odredbama člana 3. stav (1) ove Odluke.

Član 7.

U vrijeme državnih i drugih praznika koji su utvrđeni kao neradni od strane nadležnog organa samo prvi dan je neradni, a za ostale dane radno vrijeme je kao u članu 4., 5. i 6. Odluke.

Član 8.

(1) Minimalno radno vrijeme u apotekama je 8 sati dnevno, a subotom 5 sati, s tim što se rad može odvijati i dvokratno, u skladu sa članom 3. ove Odluke.

(2) Apoteke mogu raditi i duže od minimalnog radnog vremena, kao i uvesti dežurstvo nedjeljom, ukoliko ispunjavaju zakonom predviđene uslove.

(3) Javna ustanova Apoteka Donji Vakuf dužna je obezbijediti dežuru za rad subotom poslijepodne, nedjeljom i u dane praznika.

Član 9.

Radno vrijeme benzinskih pumpi, te ugostiteljskih i trgovinskih objekata koji rade u sastavu benzinskih pumpi može trajati u vremenu od 00 do 24 sata.

Poglavlje II. Radno vrijeme ugostiteljskih objekata i objekata u kojima se pružaju usluge igara na sreću

Član 10.

(1) U zavisnosti od kategorizacije i vrste ugostiteljskog objekta, radno vrijeme istih može trajati:

1. Hoteli, moteli, pansioni i drugi objekti koji pružaju usluge smještaja i to odjel recepcije, od 00 do 24 sata.

2. Disko barovi i disko klubovi od 18 do 02 sata, a petkom i subotom, u ljetnom periodu do 03 sata, s tim da se u dane državnih i vjerskih praznika radno vrijeme može produžiti do 03 sata u zimskom periodu, odnosno do 04 sata u ljetnom periodu.

3. Noćni barovi i noćni klubovi od 20 do 03 sata.

4. Ugostiteljski objekti u kojima se organizuju prigodne svečanosti i zabave različitog sadržaja (svadbe, rođendani, maturske svečanosti, godišnjice, proslava: Nove godine, Dana žena, Valentinova i sl.) mogu raditi u radnom vremenu od 17,00 sati do 03,00 sata narednog dana, ukoliko su prethodno pribavili rješenje o produženju radnog vremena.

5. Automati za prodaju hladnih i toplih pića i napitaka, sendviča i drugih toplih jela, slastica i drugih sličnih proizvoda postavljeni na javnim površinama, od 06 do 22 sata.

6. Ostali ugostiteljski objekti od 06 do 23 sata u zimskom periodu, od 06 do 24 sata u ljetnom periodu, s tim da se u dane državnih i vjerskih praznika radno vrijeme može produžiti do 02 u zimskom periodu odnosno do 03 sata u ljetnom periodu.

(2) Ugostiteljski objekti smješteni u objektima autobuske stanice i benzinskih pumpnih stanica, mogu raditi u radnom vremenu objekata u kojima se nalaze, uz uslov da se u toku rada ne remeti javni red i mir.

Član 11.

Ljetne bašte postavljene na javnim površinama te ljetne bašte uz ugostiteljski objekat moraju biti raspremljene pola sata nakon završetka rada.

Član 12.

U svim ugostiteljskim objektima iz člana 10. ove Odluke nije dozvoljeno izvođenje ili emitovanje muzike poslije 23 sata, ukoliko ima čujnost izvan zatvorenog objekta u kojem se emituje, a shodno Odluci o javnom redu i miru.

Član 13.

(1) Nadležna općinska služba može, na pisani zahtjev vlasnika ugostiteljskih radnji koje posluju tokom cijele godine i koje za predmetni objekat imaju odobrenje ovog organa o ispunjavanju uslova za obavljanje ugostiteljske djelatnosti, izdati jednokratno odobrenje za produženje radnog vremena do 03 sata, ukoliko se u ugostiteljskom objektu organizuje prigodna proslava.

(2) Uz zahtjev, koji se dostavlja najkasnije 7 dana prije, ugostitelj je dužan dostaviti:

a) dokaz da poslovni subjekt ili njegova poslovna jedinica, kao i odgovorno lice poslovnog subjekta, nije pravosnažno kažnjeno zbog remećenja javnog reda i mira i zbog nepoštovanja odredbi ove Odluke, u periodu tri mjeseca unazad od podnošenja zahtjeva za produženje radnog vremena ugostiteljskog objekta što dokazuje dokazom izdatim od strane Policijske stanice Donji Vakuf,

b) dokaz o izmirenim obavezama ugostitelja prema Općini Donji Vakuf (izdaje Služba nadležne za finansije),

c) dokaz o izmirenim obavezama ugostitelja prema javnim preduzećima čiji je osnivač Općina (izdaje javno preduzeće),

d) dokaz o izmirenim poreznim obavezama izdat od strane nadležne Porezne ispostave,

e) dokaz o uplaćenju administrativnoj taksi u iznosu od 50,00 KM.

Član 14.

Objekti u kojima se obavljaju djelatnosti koje se odnose na igre na sreću u skladu sa Zakonom o igrama na sreću Federacije BiH, kao i djelatnosti koje se odnose na pružanje internet usluga, a u

kojima se ne služe alkoholna pića i ne pušta muzika, mogu svoje radno vrijeme organizovati najkasnije do 23 sata, ukoliko ispunjavaju uvjete predviđene zakonom koji reguliše ovu oblast.

Poglavlje III. Radno vrijeme ustanova za dnevni boravak djece i u oblasti obrta

Član 15.

Radno vrijeme ustanova za dnevni boravak djece (obdaništa, vrtići, igraonice i slično) može se utvrditi u trajanju od 06,30 do 18 sati.

Član 16.

(1) Poslovni subjekti koji obavljaju obrtničke i druge srodne djelatnosti moraju obezbijediti minimalno radno vrijeme, u skladu sa članom 2. ove Odluke, a izuzetno mogu raditi i u dvije smjene, prema ispunjenju minimalno tehničkih uvjeta potrebnih za rad određenih obrtničkih zanimanja.

(2) Radno vrijeme poslovnih subjekata iz stava (1) ovog člana ne odnosi se na proizvodne pogone i radnje koje zbog karaktera procesa proizvodnje moraju poslovati mimo utvrđenih vremenskih intervala, uz obavezu poštivanja javnog reda i mira, isključivo u dijelu proizvodnog procesa.

DIO TREĆI - Izuzeci od propisanog radnog vremena

Član 17.

Općinsko vijeće ovlašćuje Općinskog načelnika da može, u slučajevima održavanja prigodnih manifestacija od značaja za Općinu, privremeno odrediti drugačije radno vrijeme poslovnih subjekata obuhvaćenih ovom Odlukom, ako ocijeni da za to postoje opravdani razlozi.

Član 18.

Općinski načelnik može za djelatnosti iz ove Odluke odrediti drugačije radno vrijeme u dane državnih i vjerskih praznika od radnog vremena propisanog ovom Odlukom, ako ocijeni da za to postoji potreba.

DIO ČETVRTI - NADZOR I KAZNE NE ODREDBE

Član 19.

(1) Nadzor nad provođenjem odredaba ove Odluke će vršiti nadležne inspekcije i Policijska stanica Donji Vakuf, svako iz svoje nadležnosti.

(2) Nadležne inspekcije i Policijska stanica Donji Vakuf ovlaštene su za podnošenje prijava za kršenje odredaba ove Odluke.

Član 20.

Novčanom kaznom u iznosu od 500,00 do 1.500,00 KM kaznit će se za prekršaj pravno lice i vlasnik radnje, ako:

- odredi radno vrijeme suprotno odredbama ove Odluke,
- na propisan način ne istakne obavijest o radnom vremenu (član 3. stav (2)),
- se ne pridržava istaknutog radnog vremena (član 3. stav (3)),
- koristi muziku suprotno propisanom ovom Odlukom,
- dozvoljava boravak gostiju nakon isteka radnog vremena.

Član 21.

Za prekršaj iz člana 20. ove Odluke kaznit će se i odgovorno lice u pravnom licu novčanom kaznom u iznosu od 300,00 do 500,00 KM.

DIO PETI – PRIJELAZNE I ZAVRŠNE ODREDBE

Član 22.

Poslovni subjekti koji posluju u objektima iz člana 1. ove Odluke dužni su svoje radno vrijeme uskladiti s odredbama ove Odluke u roku od 30 dana od dana njenog stupanja na snagu.

Član 23.

Stupanjem na snagu ove Odluke prestaje da važi Odluka o radnom vremenu u oblasti uslužnih djelatnosti ("Službeni glasnik Općine Donji Vakuf", broj: 7/08 i 2/19).

Član 24.

Odluka stupa na snagu danom objavljivanja u "Službenom glasniku Općine Donji Vakuf".

M.P.

Predsjedavajući općinskog vijeća

Hodžić Muhamed s.r.